

Fasnacht 2010



**ALTI HAIMELIGI
VERSCHNUUFFER**

Plus belle dangg Skalpelli

Uss alt mach ney,
dr Doggter Niggi Frey
wetzt sy Skalpelli
pour faire plus belle,
nit numme d Frau,
dr Herr Schwyzer nämlig au,
losst sy Gurgge im Gsicht,
denn schön sy isch Pflicht,
verglainere und korrigiere,
si darf nimm so dominiere,
dä krummi Naaserugge,
muess me in d Mitti drugge.
Ass s Nääsli guet duet sitze,
e bitz Knoche abespitze,
drnoo schnätzle in e gueti Form,
s Honorar drfir isch enorm.
Dr Patiänt ka s nit fasse,
das zaahlt kai Granggekasse.

**Dr Couchepin schetzt sy Zingge,
duet is fröhlig Aadie wingge.**

Au d Frau Schwyzer wotts wüsse,
ass si wiider geil ka küsse,
mien subito nundefaane,
diggi Schluuchbootlippen aane.
Dr flotti Doggter im wysse Kittel
spritzt Botox, das Wundermittel,
drey Mool rund umms Muul,
dasch doch aifach kuul,
no s Doppelkiini spanne,
hoffentlig gohts ohni Panne.
Die grosse Baggeknocche
wärde, wie verschproche,
non e bitz abegschliffe,
das ka me jo begriffe,
friehner het die alti Schachtle
miesse Nivea iber d Falte spachtle.
Schlussändig ass letschte Schritt
dr ultimativi kiehni Schnitt
zer Tränesagg-Korrektuur
und fertig isch die Prozeduur.

**Das duet doch innere Friide stifte,
wenn frau losst d Fudibagge lifte.**

Mir hätte do non en Idee,
no anderi Ygriff miesste gscheh.
Zem Byschpil bym Ueli Schlür,
dasch sowieso e bitz e Gschwür.
Däm sott me, oh ha lätz,
poliere sy roote Kupferblätz.
Sy populistisch Gedanggeguet,
wo sich im Hirni sammle duet,
isch doch ehnder bruun,
steere wurd ihn das doch kuum,
uns würd das hailos entzügge,
pflanzt däm y e bruuni Perügge.

**No dr OP duet dr Buuse schiile,
jetzt ka ma nimm dranumme spiile.**

Dr Christoph Mörgeli,
macht is au no Sörgeli.
Dr Strateeg vo dr SVP
vergiftet s Klima als wie meh.
Ass me wider säälig ka pfuuse,
mien alli Krimi-Ussländer uuse.
Är prediget, denn sygs perfäggt,
vom Volgg gwählt wärde, zwor diräggt
wyls e so nimm wytergoht
miess dr gsammti Bundesroot.
In d EU, e Voll-Bytritt
isch fir ihn dr gröschti Schitt.
Däm sott me mit Stärnli-Faade,
das wär jo gar kai Schaade,
zammenaije und zwor dicht
sy bööse Suppeschlitz im Gsicht.

**Mir wurde glatt die «Alte» singe,
wenn das e Doggter wurd fertig bringe.**

Dr Silvio Berlusconi
kapierts halt immer noni,
sy Schönhaitswahn, molto penibel,
Sexaffäre, völlig unsensibel.
Luutstark duet är ummerüssle,
jetzt no mit eme Sprung in dr Schüssle.
Fätt absuuge, Falte straffe,
mache numme dummi Affe.
Was aber alli wundere duet,
ass Italie nit het dr Muet,
dä goht doch alle so uff d Närke
fertig jetzt und uusewärfte.

**Dr Silvio versuecht mit viil Mieh
syni Falte hinter d Ohre z zieh.**

Ebbis no zem Schluss
an dr Fasnacht gäbs Verdruss,
Schönhaitsdöggtter looset zue,
löön d Naase vo de Waggis jo in Rueh.

D Ladäärne-Uusstellig uff em Minschterplatz und d Waage- und
Reggwisye-Uusstellig bi dr Kasäärne sinn vom Mäntig znacht
bis am Mittwoch demorge, 22. bis 24. Hornig. Dert ka men au
alli Zeedel und Schnitzelbängg, d Blagedde und dr Rädäbäng
kaufe. Wotsch drumme oder pfyffe bi unsere Junge, ob Bueb
oder Maitli – bi de Gnepf bisch willkumme!
Uuskunft git: gnepf@verschnuuffer.ch